

四庫全書

史部

欽定四庫全書

西湖遊覽志卷七

明 田汝成 撰

南山勝蹟

自清波門折而東南為鳳凰山

鳳凰山兩翅軒翥左薄湖滸右掠江濱形若飛鳳一  
郡王氣皆藉此山自唐以來肇造州治蓋鳳凰之右  
翅也錢氏因之遞加拓飾逮於南宋建都而茲山東

麓環入禁苑張閎華麗秀比蓬峴佳氣扶輿萃於一  
脈開署布政駐輦宅中民吏之所憑依帝王之所臨  
泣隱隱賑賑者六七百年可謂盛矣元時納胡僧之  
說即故宮建五寺築鎮南塔以壓之而茲山到今落  
寞乃即開元宮建省治面對吳山蓋鳳凰之左翅也  
我朝因之而官司位署皆列左方為東南雄會豈非  
王氣移易發洩有時也山據江湖之勝立而環眺則  
凌虛驚遠環異絕特之觀舉歸眉睫

其麓為萬松嶺萬松書院八蟠嶺留月臺玉壺臺

萬松嶺夾道多巨松在唐時已有之白樂天湖上夜  
歸詩半醉閒行湖上東馬鞭敲鞵轡玲瓏萬株松樹  
青山上十里沙堤明月中樓角漸移當路影潮頭欲  
過滿江風歸來未放笙歌散畫戟重開蠟炬紅南宋  
時密邇大內碧瓦紅簷鱗次櫛比今夷為大塗而松  
亦無幾矣

萬松書院本報恩寺故址也弘治十年參政周木燬

寺而建書院中設先師孔子及四配像為大成殿明  
道堂居仁由義二齋顏樂曾唯二亭南北楔綽二曰  
德侔天地道貫古今以孔氏子孫世守之嘉靖五年  
御史潘倣建毓秀閣翼以精舍以待四方遊學之士  
八蟠嶺在萬松嶺右過北而南可達月岩王元章詩  
路遶危垣上風高松檜鳴花飛殊失意草長不知名  
遊客諮遺俗居民指舊京浮屠天末起瞻望忽傷情  
留月玉壺二臺在書院右方上為月岩下為圭石中

有四亭曰振衣曰可汲曰依雲曰見湖秀石巉巖青  
蒼玉削累累然若芙蓉之未舒隱見草莽者不可勝  
記

嶺畔舊有報恩寺唐元貞間建元至正間築城移建  
大井巷國初併海會寺成化間仍徙故址內有舞鳳  
軒萬菊軒浣雲池銅井白樂天浣雲池詩白雲本無  
心舒卷長自潔影落一鑑空可浣不可涅鳶飛魚躍  
間上下俱澄澈此意難與言覽之自怡悅 蘇子瞻

萬菊軒詩一軒專為黃花設富擬人間萬石君佳本  
盡從方外得異香多在月中聞引泉北澗分清露開  
徑南山破白雲此意欲為知者道陶翁猶自未離羣  
嶺上有沈婆井嶺下有郭公井相傳晉時郭璞所  
相鑿者蓋其時杭州皆濱江斥鹵艱於甘泉故地脈  
非璞不可識鐵冶嶺亦有郭璞井

又東經鳳山門折而南過萬松坊為報國講寺

萬松坊永樂己亥金臺王玘書

報國寺元至元十三年從嘉禾楊喇勒智之請即宋故  
內建五寺曰報國曰興元曰般若曰僊林曰尊勝報  
國寺即垂拱殿殿角有銀杏樹其實無心楊仲弘詩  
所謂萬年珠樹落秋霜是也內有碧梧軒舞鳳軒興  
化寺即芙蓉殿般若寺即和寧門僊林寺即延和殿  
尊勝寺即福寧殿下有曲水流觴嘉禾楊喇勒智發宋諸  
陵建塔其上其形如壺俗稱一瓶塔高二百丈內藏  
佛經數十萬卷佛菩薩像萬軀璽飾如雪故又名白



塔至順辛未正月十四日黎明雷震之至正末為張  
士誠所毀其寺鐘即故內禁物也西有望江亭大江  
百里盱眙可覽至今有尊勝菴四寺雖隘而景致宏  
麗延祐至正間諸寺遞燬皇明洪武二十四年重建  
報國寺僧噩夢堂舞鳳軒詩江濤曉上青崔嵬山勢  
遠從天目來錢氏豈能當王氣郭生端復是僊才光  
搖晴旭九苞動影拂秋旻雙翅回為我翩然覽輝下  
一軒著此亦宜哉 楊仲弘錢唐懷古詩西湖清濁

自天開鴻鴈鳬鷺日往來黃道星辰環太乙紫微宮  
殿擁蓬萊能文競奏王褒頌獻壽深傾阿母杯九域  
輿圖今混一百年耆舊獨興哀其二山回禁籞入雲  
長無復陳兵衛兩廂千古金鐘埋野草萬年珠樹落  
秋霜龍文不徙陽人聚鳥篆終歸軹道傍九市塵埃  
來衮衮一江風浪去茫茫其三斜界鉤陳通大道中  
分魏闕對層巒雲生殿上金爐暗露下庭前玉井寒  
江漢飛龍俄杳杳滄溟泛鷁竟漫漫中天會合寧非

數坐見蒼生奠枕安其四化城宮闕被層阿棟宇高  
低若湧波翠石文章題日月寶珠光燄燭山河空桑  
說法黃龍聽貝葉繙經白馬駝誰道一無超衆有祇  
今塵土重來過 僧宗泐詩欲識錢唐王氣徂紫宸  
宮殿入青蕪朔方鐵騎飛天塹師相樓船宿裏湖白  
鴈不知南國破青山還傍海門孤百年又見城池改  
多少英雄屈壯圖又云天地無情日月徂鳳凰山下  
久榛蕪獨憐內殿成荒寺空見前山映後湖塞北有

誰遺一老海南無處問諸孤蓬萊閣上秋風起先向  
燕京入畫圖 錢思復同武仲仁登白塔詩鹿苑蕭

條景龍山慘淡陰百年同感慨九日此登臨宮葉詩  
誰寫離花酒共斟不知城外雨涼思滿幽襟其二香  
火今朝寺雲山前代宮雕欄陳蹟在白塔溟烟籠雨  
泣交龍柱風悲孤鳳桐惟應江上水千古酹英雄其  
三宋宮傳是唐朝寺白塔崔嵬寢殿前夏雨染成千  
樹綠暮嵐散作一江烟蒼苔門外銅鋪暗細柳營中

畫角傳寂寞葫蘆宮井畔野人拾得舊金鈿 鄭洪  
詩江山襟帶尚依然王氣消沈已百年八葉龍孫東  
入海六宮綵女北歸燕銅駝荊棘西風裏石馬莓苔  
落照邊玉匣遊魂飛劫火五陵嘉樹不啼鵑

宋行宮即錢王舊宮也皇城九里入和寧門左進奏  
院玉堂右中殿外庫至北宮門循廊左序巨璫幕次  
列如魚貫祥曦殿朶殿接修廊為後殿對以御酒庫  
御藥院慈元殿外庫內侍省內東門司大內都巡檢

司御厨天章等閣廊回路轉衆班排列又轉內藏庫對軍器庫又轉便門垂拱殿五間十二架長六丈廣八丈四尺簷屋三門長廣各丈五朵殿四兩廊各二十間殿門三間內龍墀折檻殿後擁舍七間為延和殿右便門通後殿殿左一殿隨時易名明堂郊祀曰端誠策士唱名曰集英宴對奉使曰崇德武舉及軍班授官曰講武東宮在麗正門內南宮門外本宮會議所之側入門垂楊夾道間以芙蓉環朱闌二里至

外宮門節堂後為財帛生料二庫環以官屬直舍轉  
外窰子入內宮門廊右為贊道春坊直舍左講堂七  
楹扁新益外為講官直舍正殿向明左聖堂右祠堂  
後凝華殿瞻景堂環以竹左寢室右齋安位內人直  
舍百二十楹左爨齋太子賜號也接繡香堂便門通  
繹已堂重簷複屋昔楊太后垂簾於此曰慈明殿前  
射圃竟百步環修廊右博雅樓十二門左轉數十步  
雕闌花礎萬卉中出鞦韆對陽春亭清齋亭前芙蓉

後木樨玉質亭梅繞之由繹已堂過錦膳廊百八十  
楹直通御前廊外即後苑梅花千樹曰梅岡亭曰冰  
花亭枕小西湖曰水月境界曰澄碧牡丹曰伊洛傳  
芳芍藥曰冠芳山茶曰鶴丹桂曰大闕清香堂曰本  
支百世佑聖祠曰慶和泗州曰慈濟鍾呂曰得真橋  
曰洞庭佳味茅亭曰昭儉木香曰架雪竹曰貴靜松  
亭曰天陵偃蓋以日本國松木為翠寒堂不施丹雘  
白如象齒環以古松碧琳堂近之一山崔巍作觀堂



為上焚香祝天之所理宗時吳知古掌焚脩每三茅  
觀鐘鳴觀堂之鐘應之則駕興山背芙蓉閣風帆沙  
鳥咸出履舄下山下一溪縈帶通小西湖亭曰清漣  
怪石夾列獻瑰逞秀三出五湖洞穴深杳豁然平朗  
翬飛翼拱凌虛樓對瑞慶殿損齋緝熙崇政殿之東  
為欽先孝思復古紫宸等殿木圍即福寧殿射殿曰  
選德坤寧殿貴妃昭儀婕妤等位宮人直舍螳聚焉  
東過閣子庫睿思殿儀鸞修內八作翰林諸司是謂

東華門 元黃潛鳳凰山故宋宮詩滄海桑田事渺

茫行逢遺老色荒涼為言故國游麋鹿漫指空山號  
鳳凰春盡綠莎迷輦道雨多蒼薺上官牆遙知汴水  
東流畔更有平蕪與夕陽 趙子昂詩東南都會帝

王州三月鶯花非舊遊故國金人泣辭漢當年玉馬  
去朝周湖山靡靡今猶在江水悠悠只自流千古興  
亡盡如此春風麥秀使人愁 楊子承詩天下車書

正一家數逢陽九亂如麻兩朝北狩過天寶四海南

奔類永嘉陵寢可憐分異域衣冠不復返中華玉簫  
吹暖錢唐月誰念黃龍慘暮笳仇仁近詩漸無南  
渡舊衣冠尚有西湖風雨寒鳳鳥不來山寂寂鴟夷  
何在海漫漫荒陵樵采官猶禁故苑烟花客自看惟  
恨餘杭門外柳長年不了送征鞍楊廉夫詩天山  
乳鳳飛來小南渡君臣又六朝劫火不燒楊璉塔箭  
峰猶抵伍胥潮燐光夜附山精出龍氣秋隨海霧消  
惟有宮人斜畔月夜深猶自照吹簫張仲舉詩南

渡君臣建業偏不堪喬木黯風烟豈知白馬興王日  
又到紅羊換劫年三輔皇圖空郡國六朝王氣渺山  
川白頭開府歸來日應覽遺蹤一愴然 錢思復詩  
登臨休賦黍離章千里江流接大荒劍鎖血華空楚  
舞鏡埋香骨失秦粧薜蘿山鬼啼螢苑荊棘銅駝卧  
鹿場寂寞萬年枝上月夜深猶照舊宮牆 陳廷言  
詩越水吳山共寂寥已無遺老話前朝海門三日潮  
聲歇天目千年王氣消夜月烏啼龍井樹春風花落

海鮮橋威儀文物今何在回首浮屠倚碧霄 王逢

詩王氣凌虛散曉霞虎闌麟閣靜烟花中天日月迂

黃道滄海風雲冷翠華望帝神遊夔子國烏衣夢隔

野人家當時舉目山河異豈但紅顏泣塞笳其二周

南風俗漢衣冠五色雲中憶駐鑾瓔珞檜高藏白獸

蕊珠花發降文鸞河通織女機絲濕雨歇巫娥翠黛

寒滿地吳山誰洒淚一江春水獨凭欄其三瑤池青

鳥集觚稜白塔金鳧閔夜燈雲母帳虛星彩動水晶

宮冷露華凝驪山草暗虛周業郿塢花繁失漢陵  
白馬素車江海上依然潮汐撼西興其四金爵觚稜月  
向低泠泠清磬萬松西五門曙色開龍尾十日春寒  
健馬蹄紅霧不收花氣合綠波初漲柳條齊遺民暗  
憶名都會尚繞湖濬唱大堤 藍澗詩南渡山川王  
氣銷西風松柏認前朝紫宸無復千官宴滄海空餘  
半夜潮龍去蓬萊曾駐輦鳳歸寥廓不聞簫上方樓  
閣依稀在暮雨疎鐘送寂寥 徐賁詩荒山欲逐鳳

鳳騫誰構浮屠壓寢園土厚尚封南渡骨月明不照  
北歸魂海門有路雙龍去沙溆無潮萬馬屯莫向秋  
風重惆悵梵王宮裏易黃昏 劉伯溫詩澤國繁華

地前朝舊此都青山彌百粵白水入三吳艮嶽銷王  
氣坤靈肇帝圖兩宮千里恨九子一身孤設險憑天  
塹偷安負海隅雲霞行殿起荆棘寢園蕪幣帛敦和  
議弓刀抑武夫但聞當宁奏不見立庭呼鬼蜮昭華  
袞忠良賜屬鏤何勞問社稷且自作歡娛杭稻來吳

會魚龜出具區至尊巍北闕多士樂西湖鷁首馳文  
舫龍鱗舞繡襦暖沙搖褭積涼月浸耀瑜紫桂秋風  
老紅蓮曉露濡巨螯擎擁劍香飯漉雕胡蝸角乾坤  
大鰲頭氣勢殊秦庭迷指鹿周室歎瞻烏白馬違京  
輦銅駝擲路衢含容天地廣養育羽毛俱橘柚馳包  
貢塗泥賦上腴斷犀埋越棘照乘走隋珠弔古江山  
在懷今歲月逾鯨鯢空渤海歌詠已唐虞鴟革愁何  
極羊裘釣不迂征鴻暮南去回首憶尊鱸



又南折而西為梵天講寺

梵天寺宋乾德中吳越王建名南塔治平中改今額  
元元統中燬皇明永樂十五年重建有石塔二靈鰻  
井金井先是四明阿育王山有靈鰻井吳越王迎阿  
育舍利歸梵天寺奉之鑿井南廊鰻忽見僧贊寧有  
記僧志銓詩落日寒蟬鳴獨歸林下寺柴扉夜未掩  
片月隨行履惟聞犬吠聲又入青蘿去 蘇子瞻和  
詩但聞烟外鐘不見烟中寺幽人行未已草露濕芒

履惟應山頭月夜夜照來去 又寒食遊南塔寺寂  
照堂詩城南鐘鼓鬪清新端為投荒洗瘴塵總是鑑  
空堂上客誰為寂照鏡中人紅芳歸去風驚曉綠葉  
成陰雨洗春記取明年作寒食杏花曾與此翁隣

唐宋以來州治故在鳳凰山下南渡駐輦因以為行  
宮而萬松八蟠介亭諸勝皆列皇城之外行宮比州  
治稍東南至江干皆禁籞也故序州治於此舊有虛  
白堂因巖亭忘筌亭碧波亭高齋東樓望海樓清暉

樓中和堂有美堂石林軒並廢 白樂天虛白堂詩  
平旦起視事亭午臥掩關除親簿領外多在琴書前  
況有虛白堂坐見海門山潮來一憑檻賓至一開筵  
終朝對雲水有時聽管絃持此聊過日非忙亦非閒  
山林太寂寞朝闕空喧煩惟茲郡齋內囂靜得中間  
樂天因岩亭詩箕穎人窮獨蓬壺路阻難何如兼  
吏隱復得事躋攀岩樹羅堦下江雲貯棟間似移天  
目石疑入武丘山清景徒堪賞皇恩肯放還遙知興

未足即被詔催還 樂天忘筌亭詩翠巘公門對朱  
軒野徑連只開新戶牖不改舊風烟空室間生白高  
情淡入玄酒容同坐勸詩借屬城傳自笑滄江畔遙  
思絳帳前庭臺隨事有爭敢比忘筌 嚴維九日高  
齋詩詩家九日憐芳菊遲客高齋對浙江漁浦浪花  
搖素壁西陵樹色入秋牕木奴向熟懸金實桑落新  
開瀉玉缸四子醉時曾講德笑論黃霸屈為邦 樂  
天東樓詩東樓勝事我偏知氣象多隨昏旦移湖捲

衣裳白重疊山張屏障綠參差海僊樓塔晴方出江  
女笙簫夜始吹春雨星攢尋蠨火秋風霞颭弄潮旗  
太守經年嘲不盡郡齋空作百篇詩又寄題郡樓詩  
官歷二十政官遊三十秋江山與風月最憶是杭州  
北郭沙堤尾西湖石岸頭綠楊春送客紅燭夜回舟  
不敢言遺愛空知念舊遊憑君吟此句題向望濤樓  
又東樓晚眺寄張水部詩澹烟疎雨間斜陽江色鮮  
明海氣涼樹散雲收破樓閣虹殘水照斷橋梁風翻

白浪花千片鴈點青天字一行好著丹青圖寫取題  
詩寄與水曹郎又東樓南望詩不厭東樓望江樓對  
海門風濤生有信天水合無痕鷁帶風帆動鷗和雪  
裏翻魚鹽聚為市烟火起成村日脚金波碎峯頭細  
點繁送秋千里鴈報暝一聲猿已豁煩襟悶仍看病  
眼昏郡中登眺處無勝此東軒又江樓夕望招客詩  
海天東望夕茫茫山勢川形濶復長燈火萬家城四  
畔星河一道水中央風吹古木晴天雨月照平沙夏

夜霜能就江樓消暑氣比君茅舍校清涼 蘇子瞻

望海樓詩海上濤頭一線來樓前指顧雪成堆從今

潮上君須上更看銀山十二回青山斷處塔層層隔

岸人家喚欲應江上秋風晚來急為傳鐘鼓到西興

樓下誰家燒夜香玉聲哀怨弄清涼臨風有客吟秋

扇拜月無人見晚粧沙河燈火照山紅歌鼓喧喧語

咲中為問少年心在否角巾敢倚鬢如蓬 樂天清

暉樓寄嚴維詩嚴維制茲樓立名曰清暉未及題花

榜遽催還粉闌去來三四年塵土登者稀今年新太  
守掃灑施簾幃院柳烟婀娜簷花雪霏微看山倚西  
戶待月闌東扉碧牕戛瑤瑟朱欄飄舞衣燒香捲簾  
坐風燕一雙飛君作不得住我來幸因依始知天地  
間靈境有所歸 中和堂本錢王閔禮堂也壯麗絕  
倫暑月最快蘇子瞻去任夏日有懷詩忠孝王家千  
柱宮東坡作吏五年中中和堂上東南頗獨有人間  
萬里風 有美堂嘉祐二年龍圖學士梅摯出守杭



州仁宗賜之詩云地有湖山美東南第一州剖符宣  
政化持橐輟才流暫出論思列遙分宵旰憂循良勤  
撫俗來暮聽歡謳摯到郡即以有美二字名其堂歐  
陽文忠公為之記畧云舉天下之至美與其樂有不  
可兼者多矣故窮山水登臨之美者必之乎寬閒之  
野寂寞之鄉而後得焉覽人物之盛麗誇都邑之雄  
富者必據乎四達之衢舟車之會而後足焉蓋彼放  
心於物外而此娛意於繁華二者各有適然其樂不

可得兼也羅浮天台衡嶽廬阜洞庭之廣三峽之險  
號為東南奇偉秀絕者乃在乎下州小邑僻陋之邦  
此幽潛之士窮愁放逐之臣之所樂也若乃四方之  
所聚百貨之所交物盛人衆為一都會而又能兼有  
山水之美以資富貴之娛者惟金陵錢唐然二邦皆  
僭竊於亂世聖宋受命金陵以後服見誅今其江山  
雖在而頽垣廢址荒烟野草過者躊躇而悽愴獨錢  
唐自五代時知尊中國効臣順及其亡也頓首請命

不煩干戈今其民幸富足安樂又俗習工巧邑屋華麗蓋十萬餘家環以湖山左右映帶而閩商嶺賈風帆海舶出入於江濤浩渺雲烟杳靄之間可謂盛矣而帥是邦者必皆朝廷公卿大臣若天子之侍從又有四方遊士為之賓客故喜占形勝治亭榭相與極遊覽之娛然與其所取有得於此者必有遺於彼獨所謂有美堂者山水登臨之美人物邑居之繁一寓目而盡得之蓋錢唐兼天下之美而斯堂者又盡得

錢唐之美焉宜乎公之甚愛而難忘也 蘇子瞻與

陳太守有美堂夜歸詩娟娟雲月稍侵軒  
灩灩星河半隱山魚鑰未收清夜永鳳簫猶在翠微間  
淒風瑟縮經絃柱香霧霏迷著髻鬟若喜使君能共樂  
萬人爭看火城還 石林軒宋郡守孫沔建燕思閣取立  
石七株置閣前號七賢石蒲宗孟更名石林軒

自梵天寺而北折而西迴繞松磴為勝果禪寺月岩

勝果寺唐乾寧間無著喜禪師建吳越王鐫彌陀觀

音勢至三佛及十八羅漢像於石壁宋慶厯初賜額  
崇聖寺元至正間燬皇明洪武初興初禪師建又燬  
永樂十五年重建松徑盤紆澗淙潺湲唐僧處默詩  
路自中峯上盤回出薜蘿到江吳地盡隔岸越山多  
古木重青靄遙天浸白波下方城郭近鐘磬雜笙歌  
王介甫詩登高見山水身在中央下視樓臺處  
空多樹木蒼浮雲連海氣落日動湖光偶坐吹橫笛  
殘聲入富陽 僧圓法師詩并序云勝果名刹相望

而高軒虛閣盡得江山之勝槩因誦謝宣城天際識  
歸舟雲中辨江樹之句頗類彼景用以為韻成詩十  
章寄勝果裕師開士雖不足發揮騷雅庶寫相懷之  
心爾 江色杳無極渺渺接遙天歸帆帶夕陽去鳥  
衝寒烟幽景不同觀遐想成斯篇 棲閣聳岩堯參  
差極雲際高牕曉色鮮晚景餘霞麗寥寥羣動息冥  
心遠塵世 冷淡杳難羣幽趣唯吾識高情薄雲漢  
清談潤金石不學浮世人奔名競雕飾 惟靜百慮

忘軒開萬象歸空江  
答夜鐘高嶠留殘暉  
幽砌絕塵蹤孤雲自依依  
惡惡如探湯觸物類虛舟  
他人莫已知此道本吾求  
獨坐時相懷斜陽下危樓  
崔巍

高山側觸石生片雲  
自將霖雨期不與塵土羣  
杳杳遊太虛對此幾思君  
高蹟將誰親幽棲白雲中  
閒階吐蒼苔古木生清風  
時將西竺詩講義訓來蒙

靜躁各所好是非安能辯  
聲利如我仇雲泉若牽挽  
寂寂深林中芳蘭自堪搴  
羣峯聳危碧倒影沈空

江清景生晚晴冷色涵虛牕逍遙縱吟賞能使吾心  
降海日照吟軒江風動庭樹此景樂閒情何人識  
高趣登樓獨南望杳杳空烟霧王伯安詩江上但  
知山色好峯迴始見寺門開半空虛閣有雲住六月  
深松無暑來病肺正思移枕簟洗心兼得遠塵埃富  
春咫尺烟濤外時倚層霞望釣臺深林容鳥道古  
洞隱春蘿天迴聞潮早江空得月多冰霜叢草木舟  
楫玩風波巖下幽棲處時聞白石歌



月巖石壁削立有隙如鏡中秋蟾魄斜圓清輝滿隙  
若合璧然其旁有月榭陳天瑞詩怪石堆雲矗太空  
女媧鍊出廣寒宮一輪常滿陰晴見萬古無虧晝夜  
同搥藥聲繁驅白兔漏天孔正透清風光明自照如  
來鏡肯學姮娥西復東 王伯安飲月榭別王侍御  
赴兩廣詩湖山久係念塊處限形蹟遙望一水間十  
年靡由即軍旅起衰廢驅馳豈遑息前旌道回岡取  
捷上崎側新構鬱層椒石門轉深寂是時霜始降風

淒羣卉折壑靜響江聲牕虛涵海色夕陰下西岑涼  
月穿東壁觀風此餘情撫景見高臆匪從羣公餞何  
因得良覲南徼方如燬救焚豈辭亟來歸幸有期終  
遂尋幽僻

月巖之左為中峯其右為宋殿前司營

中峯之上有亭曰天峯孤嘯少師夏公謹所題峯之  
後為三佛石僊姑洞郭公泉臥醉石放光石

宋殿前司營為親軍護衛之所俗稱御校場者是也

山頂石笋林立蒼翠玲瓏森若朝拱錢氏命為排衙  
石第二峯舊有白塔塔西小徑石壁夾道通人往來  
名為石衙宋初名公多題刻其間從此南望則長江  
帶繞北眺則西湖鑑開山下有金星洞通明洞柳浦  
皆蕪汨不可蹤蹟蘇子瞻金星洞銘云寶山南麓鳳  
左翅驚雷劃石逋蚪起凝陰噓堅出怪瑋是生神草  
肖蒼虺離離赤痣挾脊尾飛流丹石決癰瘡金星非  
實特取似施及山石亦見謂凡名相因皆此比 鄭

繼之登御校場望故宮詩萬峯雲木鬱蒼蒼古壘仍  
存閱武場南渡關河雙眼盡中原風物百憂旁尚傳  
草莽開黃屋想見龍蛇繞御床往事只今俱灑淚兩  
階干羽意何長

峯畔舊有冲天觀望海亭介亭崇聖塔並廢 冲天  
觀在介亭後 介亭宋祖無擇建蘇子瞻登介亭餞  
楊傑次公詩監輿西出登山門喜與我友尋僊村丹  
清明減風篁嶺環珮空響桃花源前坡欲上已臘屐

黑雲白雨如傾盆，今晨積霧卷千里。豈畏觸熱生病，  
根在家頭陀。無為子多與青山為弟昆，孤峯盡處亦  
何有。西湖鏡天江抹坤，臨高麾手謝好住。清風萬壑  
傳其言，風回響答君聽取。我亦到處隨君軒。次劉  
景文詩。澤國梅雨餘，衰年困蒸溽。高堂磨新磚，頗覺  
利腰足。松根百尺井，兩綆飛淨綠。流觴聚兒童，一笑  
為捧腹。清風信可馭，剛氣在巖麓。始知共此世物外，  
無三伏。長歌入雲烟，不待絃管逐。西湖真西子，烟樹

點眉目濤江少醞藉高浪翻雲屋俛仰撫四海百世  
飛鳥速遠追錢氏餘近弔祖侯躅吾生如寄耳寸晷  
輕尺玉誰似劉將軍逸韻謝邊幅千言一揮手五車  
不再讀春巖彩鷄舞月峽哀猿哭朝先啼鳩起暮與  
寒蜚續我老毀吟哦賴君時擊觸從今事遠覽發軔  
此幽谷清游得三昧至樂謝五欲莫作狂道士氣壓  
劉師服再次袁公濟詩昏昏墮醉夢禁此六月溽君  
詩如清風吹我朝睡足登臨得佳句江白照湖綠袖

手猶不言默藁已在腹是時風雨逼靄靄雲歸麓疎  
星帶微雨金火爭見伏惜哉此清景變滅不可逐歸  
來讀君詩耿耿猶在目却思少年日聲價爭場屋文  
如翻水成賦作又手速秋風起鴻鴈我亦繼華躅那  
知君蹭蹬獨泣荆山玉相見南新道青山垂破幅早  
知事大謬恨不十年讀莫嗟馮唐老終勝賈誼哭今  
年復為僚舊好許重續升沈何足道等是蠻與觸共  
為湖山主出入窮澗谷衆馳君不爭人棄我所欲何

時神武門相約挂冠服 陳述古召飲介亭詩西風  
初作十分涼喜見新橙透甲香遲暮賞心驚節物登  
臨病眼怯秋光慣眠處士雲庵裏倦醉佳人錦瑟旁  
猶有夢回清興在臥聞歸路樂聲長 崇聖塔高七  
級二十餘丈宋景祐初建慶厯中郡守鄭戩請加崇  
聖之號南渡毀入行宮

又西為棲雲庵

棲雲庵小雲石海涯別業也其父楚國公貫只哥雲



石遂以貫為氏號曰酸齋年十二三膂力絕人使健  
兒驅三惡馬疾馳持槩立而待馬至越二而跨三運  
槩生風觀者辟易或挽强射生逐猛獸上下峻阪如  
飛稍長折節讀書目五行下庵其藏修之所也由門  
徑而西可達龍華寺

又南為包家山山川壇

包家山多桃花宋時有關扁曰蒸霞二月遊人最盛  
號小桃源董嗣杲詩綺霞蒸日透林梢一簇南山尚

姓包冷水峪邊苔色老冲雲樓下樹陰高園隣古道  
傳耕藉臺倚青城想拜郊欲趁桃花尋隱去關門無  
鎖不須敲 錢思復詩平生鹿門趣有意此誅茅地  
控江分越山因人姓包海鷗飛落日野馬牧荒郊流  
水花千樹重期載酒肴 張仲舉清明遊包家山詩  
二首遠近紅千樹繁開奪艷霞月明寒食雨春老上  
陽花輦路迷游躅宮詞入夢華東風葵麥恨回首野  
人家 太液曾來鵠高臺舊影娥美人黃土盡故國

白雲多野草荒神藉宮蓮怨棹歌羌兒洗馬虎斜日  
滿寒波

山畔舊有上善庵福泉庵並廢 上善庵淳祐七年  
建俗名白衣五聖廟 福泉庵淳祐四年建有龍王  
井方丈餘雖旱不竭又名冷泉峪

山川壇洪武元年先擬建山川壇於城西北風師壇  
於城東北雨雷師壇於城西南二年詔風雲雷雨合  
一壇尋又詔併山川共為一壇八年又詔併城隍合

祭

壇之左為正宗庵右為三一庵

正宗庵元至大間僧大方建

三一庵白玉蟾煉丹之所有像存焉白玉蟾南海瓊

州人當宋乾道間於黎母山中遇神人授洞玄雷法

遨遊江湖修真訪道嘉定中召赴行都對御稱旨命

主太乙宮更結小庵於此一日去不知所往庵中有


得月樓前有石池白玉蟾詩風吹玉露洗銀濤爽氣

平分桂影高把笛倚樓人不寐此時直擬數秋毫千  
崕爽氣已平分萬里青天輾玉輪起向錢唐江上望  
相逢都是廣寒人 貫酸齋詩茅棟蕭蕭水石間放  
懷終日對林巒夢回不覺舟臨砌吟罷始知身倚欄  
藥碓夜舂雲母急石瓶秋迸井花寒羣魚亦得逍遙  
樂何用機心把釣竿

又南為大慈禪寺

大慈寺俗稱包山寺宋乾道九年僧德殊建淳熙間

賜額



西湖遊覽志卷七

# 欽定四庫全書

史部

西湖遊覽志卷八

詳校官太僕寺少卿臣李廷欽

刑部郎中臣許兆椿覆勘

總校官編修臣王燕緒

校對官中書臣葉蘭

謄錄監生臣汪兆鼎



欽定四庫全書

西湖遊覽志卷八

明 田汝成 撰

北山勝蹟

出湧金門而北為豐樂樓

豐樂樓宋初為衆樂亭尋改聳翠樓政和中改今名  
淳祐九年安撫趙與憲重構之瑰麗崢嶸掩映圖畫  
俯瞰平湖千峰連環一碧萬頃柳汀花塢歷歷欄檻

間亭榭翬飛遠近映帶遊撓冶騎菱歌漁唱往往會  
合於樓前元末乃燬嘉靖二十年郡守陳公仕賢毀  
柳洲寺而重建之為賓使館所題曰柳洲別館館後  
有樓題曰豐樂存舊蹟也編修金璐為之記宋趙忠  
定公詠豐樂樓柳梢青詞水月光中煙霞影裏湧出  
歌臺空外笙簫雲間笑語人在蓬萊天香暗逐風回  
正十里荷花盡開買箇小舟山南遊遍山北歸來  
元楊仲弘詩崢嶸飛構壓名邦西望平湖東望江氣

合重玄蒙沆瀣標存九域奠洪龐朝來散霧縈朱戟  
夜后流星透碧牕倚遍欄干愁目眩飛鳶旋轉故雙  
雙

柳洲寺宋開寶間錢王建本名資福院院旁有通元  
庵會靈廟即五龍王祠開禧元年趙師異併為柳洲  
寺洲旁有黑亭子灣呂洞賓祠集賢亭上船亭養魚  
莊環碧園迎光樓劉氏園並廢上船亭賈似道建  
養魚莊環碧園皆楊和王別業軒亭皆高宗御書

金匱山房集卷八  
迎光樓張循王別業 劉氏園內侍劉王外宅

出錢唐門瀕湖為玉蓮堂折而北為來鵲樓

玉蓮堂舊在府治中宋時安撫魏克愚徙建於此都人競渡湖中以此為奪標之所久廢皇明嘉靖二十一年按察僉事劉望之欲建賓館於此問名於汝成汝成為陳故實且曰興滅闡德以無忘前人復其名為玉蓮堂何如公欣然首肯乃濬池環門樹以白荷甫成而公以憂去扁額尚未揭也俚人但稱月牙公

館云

來鵲樓邑人張文宿別墅也嘗為晉江令有雅致寄  
傲湖山構樓湖畔棟宇經始有鵲巢焉遂名來鵲樓  
錢唐門沿城而北舊有錢武肅王廟九曲城菩提院  
真覺院法濟院妙因院寶嚴院普潤寺玉壺園望湖  
樓賈府上船亭謝府新園擇勝園隱秀園並廢 錢  
武肅王廟王名鏐臨安石鑑鄉人驍勇有智畧壯而  
微販鹽自活唐僖宗時王僊芝寇兩浙命都將董昌

討鎮之鏐屬昌部平朱直拒黃巢斬劉漢宏累功拜  
杭州刺史擒薛明破徐福加防禦使進蘇杭等州觀  
察使新作杭城自秦望山由夾城東亘江干泊錢唐  
湖霍山范浦凡七十里進鎮海軍節度使封開國公  
會董昌反越州鏐受詔討滅之進彭城郡王加中書  
令圖形凌烟閣名其營曰衣錦營封其山曰衣錦山  
改封越王再改吳王梁開平初進封吳越王築捍海  
塘建候潮通江等門時江濤怒嚙命强弩數百射之

濤為斂却還擊西陵尋授天下兵馬都元帥後唐同  
光初賜玉冊金印長興二年卒年八十三謚武肅篤  
孝善撫士卒臨政勤警無倦容當中原繹騷而保鎮  
疆域民甚德之五傳至忠懿王俶當宋太祖受命時  
納土子孫代為顯官 九曲城有五聖廟蘇漢臣畫  
壁 菩提院本錢惟演別墅也捨以為寺有白蓮綠  
野等堂碧玉四觀披顥等軒南漪迎薰澄心涵碧玉  
壺雪氍毹等亭後併入昭慶寺周紫芝菩提小軒晚

晴詩杭潁雌雄本自殊  
淡粧濃抹是吳姝  
滿傾漲玉千鍾酒來看  
鎔銀百頃湖  
白鳥去邊山潑黛  
綠蒲疎處雨跳珠  
不知能事王摩詰  
貌得西山落照無  
真

覺院即隱淨庵  
法濟院舊名觀音院  
有明軒爽軒

妙因院即慈光庵  
寶嚴院俗呼九曲院  
普潤

寺宋淳熙初建  
元末燬  
玉壺園宋理宗時御園也

本廊王劉琦別業  
後屬官家林亭幽雅  
長夏森寒  
張輿詩林亭絕幽迴  
長夏綠雲香  
明月出山小白蓮承



露涼誰敲樓頭急吳歛風外長脩然玉壺內渾與世  
相忘望湖樓在昭慶寺前錢王所作一名先得樓  
潘閬詩望湖樓上立竟日懶思還聽水分他界看雲  
過別山孤舟依岸靜獨鳥向人閒回首重門閉蛙聲  
夕照間蘇子瞻詩黑雲翻墨未遮山白雨跳珠亂入  
船卷地風來忽吹散望湖樓下水如天放生魚鱉逐  
人來無主荷花到處開水枕能令山俯仰風船解與  
月徘徊未成小隱聊中隱可得長閒勝暫閒我本無

家更安往故鄉無此好湖山王介甫詩水光山氣碧  
浮浮落日將歸又少留從此祇應長入夢夢中還與  
故人遊 謝府新園故甘氏園也為太后別墅在惠  
照齋宮西有道院村庄水閣一碧萬頃眉壽等堂湖  
山清觀歇涼等亭備華極邃架亭湖中每元夕亭館  
皆垂水晶簾放燈上下暉映金碧奪目士女縱觀往  
往得遺簪墜珥元時元帥夏若水據有之 擇勝園  
在九曲城下宋秀王別墅理宗御書擇勝愛閒二扁

隱秀園劉廊王別墅

折而西過溜水橋為昭慶律寺

溜水橋洩湖水以入下湖可通新河壩

昭慶律寺晉天福間吳越王建宗乾德二年重修太

平興國三年建戒壇於寺中每歲三月三日海內緇

流雲集於此推其長老能通五宗諸典者登壇說法

敷陳具戒其徒跪而聽之名曰受戒至今行之天僖

初有圓淨法師學廬山慧遠結白蓮社縉紳之士與

會者二十餘人運使孫何為之記南渡後以其地為  
策選鋒軍教場尋復為寺元末燬皇明洪武間重建  
成化間燬雲水僧廣慎復營之宋陳堯佐詩湖邊山  
影裏靜境與僧分一榻坐臨水片心閒對雲樹寒時  
落葉鷗散忽成群莫問紅塵事林間肯暫聞 王元  
之詩夢幻吾身是偶然勞生四十又三年任誇西掖  
吟紅葉何似東林種白蓮入定雪龕燈焰直講經霜  
殿磬聲圓謫官不得餘杭郡空寄高僧結社篇

昭慶寺之北為慶忌塔

慶忌塔者春秋時吳王闔閭既弑王僚僚子慶忌奔  
衛闔閭患之謀諸伍員員進細人要離俾之行刺要  
離者細而寡力迎風則僵負風則伏王語以慶忌之  
勇謂其不如也要離曰臣能殺之臣詐以負罪出奔  
願王戮臣妻子斷臣右手慶忌必信臣矣王從之要  
離乃詐奔諸侯宣怨於路遂如衛見慶忌言闔閭無  
道願因王子之勇可得也慶忌信之簡練士卒與還

襲吳渡江要離坐於上風因風之勢以矛鉤其冠順風而刺慶忌死葬於此其地在宋為豐儲倉前有石池深不可測宋咸淳六年七月池水壁立浮苴登木蕩突久之或云中有大龜數百年者故興妖如此又時有怪物出水若鐵棺然

自昭慶寺而西過石函橋為放生亭

石函橋唐刺史李泌建有水閘泄湖水以入下河沿東西馬塍羊角埂至歸錦橋凡四派白樂天記畧云

北有石函南有筭決湖水一寸可溉田十五餘頃每一復時可溉五十餘頃其去郡別州民詩云耆老遮歸路壺漿滿別筵甘棠無一樹那得淚潸然稅重多貧戶農飢足旱田惟留一湖水與汝救荒年

放生亭在寶石山麓宋天禧四年王欽若請以西湖為放生池禁民採捕郡守王隨為之記有碑存焉慶元四年趙師霁建德生堂飛泳亭於橋畔理宗御書並廢

又北過羊坊橋小溜水橋為靈衛廟

羊坊橋宋時滌羊之所也有酒庫瓦子在焉其西為

古柳林

小溜水橋俗稱水磨頭其下為棕毛場

靈衛廟宋建炎三年金酋完顏宗弼犯臨安郡守康  
允之退保赭山錢唐令朱蹕鳩鄉兵二千邀擊之力  
戰死尉將金勝祝威復集凋兵據葛嶺編竹覆泥為  
大途以誘賊賊騎颺至踟躕而踣仆者鱗疊橫屍山



委金人大駭遁赤山得奸細為導由南壁入勝威被  
執死之郡人感其忠節以馬革裹屍駢葬雲洞之右  
立祠祀之後人并以祀蹕淳祐間賜廟額曰靈衛至  
今人稱金祝廟者從始建意也每歲七月一日守臣  
致祭蓋金公誕辰云

石函橋之北舊有趙郭園水丘園梅莊園聚秀園錢  
氏園張氏園王氏園萬花小隱園竹所雲洞園瑤池  
園錢唐縣尉司寶勝院洞明庵精進院延慶院澄寂

院並廢 梅莊園者宋韓蘄王別業也廣一百三十畝有樂靜堂清風軒皆高宗御書水閣梅坡芙蓉堆花竹輝映皆聚景之所四時可遊吳立夫花園老卒歌蘄王手種紅錦花十載不掛鐵鋌鍛花園老卒守花樹睡着花磚聞曙雅白頭白盡身無事古塞沙塵戰餘騎多士如雲足健兒一奇在腹終憔悴青銅萬緡滿地光寶函矯節賜夷王宮粧粉豔去酣酒海貨珠賸歸壓檣王家舍兒驚吐舌御府珊瑚碎飛雪口

猶乳臭却帳前雙鑠一翁嗟棄捐君不見天下英雄  
本材武左鼻成龍右鼻虎頸血淋漓思繫鼓史傳沉  
埋誰比數花落花開幾風雨雲洞園者楊和王別  
業也培土為洞屈曲通行圖畫雲氣其旁有麗春臺  
青石為坡不斷礮齒春時令麗人歌舞為戲得上坡  
者受賞園內有萬景天全方壺瀟碧天機雲錦紫翠  
間濯纓五色雲等亭榭玉龍玲瓏金粟天砌等臺洞  
戶牖輝煌花木蟠鬱窮極麗雅盛時凡用園丁四十

餘人監園使二人洞後有天龍庵嘉定間惠開法師  
建瑤池園中貴呂氏外宅也池週二里植菱芰池  
側有寶勝院錢唐縣尉司相傳為王子高故居宋

隆興間建時宇內承平茲邑特繁麗仁宗常覽西湖  
圖嘆曰真仙尉也遂建真仙亭蘇子瞻常率賓僚遊  
焉建英遊閣林和靖訪謝尉賦秋水芙蓉詩建詠物  
樓洞明庵咸淳中朱端卿捨宅建精進院舊名  
儲修晉開運間建延慶院舊名興化寺澄寂院

近桃花街口

過石函橋而西為寶石山崇壽禪寺寶所塔壽星石石  
屏風獅子峰屯霞石看松臺落星石乳泉井一勺泉天  
然圖畫閣

寶石山本名巨石山高六十三丈周一十三里錢王  
封為壽星寶石山羅隱為之記其下為寶稷山山下  
有乳泉佛足泉其絕頂為寶峰

崇壽禪寺吳越王之臣吳延爽者請東陽善導和尚

舍利建塔於山巔附以佛廬宋開寶初賜額曰崇壽  
院洪武初有高僧慧炬出家院中明天台教時江濤  
大溢炬說法洒淨水止之隄賴以不圯杭人稱炬菩  
薩云

寶所塔延爽建九級尋崩咸平中僧永保以目青募  
緣十年始復其舊目光如故保有戒行人呼師叔遂  
稱保叔塔也塔門舊有張即之書湖山勝槩四字今  
移置淨慈寺閣元延祐中院塔俱燬僧可周建至正

未又燬僧慧炬重建至七級而止皇明成化間燬弘  
治間僧可勝重建一夕大雷擊死遊僧三人大蛇一  
條重五十斤腹中白子數十枚塔漸崩廢正德九年  
僧文鏞重建又築西方殿於塔後挹涼亭於山下嘉  
靖元年塔燬二十二年僧永果重建永果山西人有  
戒行募緣多助咸稱老山西又有全真號浪滔滔者  
亦與協力故能飾復舊美錢思復詩金刹天開畫鐵  
簷風語鈴野雲秋共白江樹晚逾青鑿屋巖藏雨黏

崖石墜星下看湖上客歌吹正沉冥

壽星石舊名落星石錢王改今名一在塔後一在看松臺下各大數十圍塊然無根望之如斲

石屏風獅子峰皆以形似名之石屏風下舊有石屏院獅子峰一名巾子峰林和靖詩巾子山頭烏白木微霜未落葉先紅者是也

屯霞石色赭如霞介立嵯岬

看松臺去寺左百步所俯臨巨壑凌駕松杪松下有



石圓如隕星施儒詩茲山亦何奇而喜遊人少我本  
煙霞徒一丘願終老王顥詩樹蓋珠林勝花開翠壁  
妍清秋一舒嘯畫裏著詩僊

亂泉井去看松臺百步所泉白而甘

一勺泉在崇壽院右壁太僕丞張瑛名之詩云絕頂  
盤峰秀蛟龍擁地蓮塔樓南斗下僧問劫灰年鬼斧  
摧堅石神功琢湧泉派疑銀漢瀉溜訝玉龍穿沆瀣  
雲根滿分明琬琰鑄一泓通海眼孤浸立山巔正正

華沉月渟渟碧醺天味翻流乳滑嵌洩濺珠圓魚躍  
金梭見虹垂寶帶懸洗甌僧瀹茗供佛客擎錢幾許  
詩脾沁徒為俗慮牽靜焉仁者學湛者定心禪渴想  
斟瓢飲酣宜漱石眠何人識恬淡終日愛潺湲莫怪  
頻來此煩痾頓覺捐

天然圖畫閣在寺右一勺泉之陽少師夏公謹詩客  
到西湖上春遊尚及時石門深歷險山閣靜憑危午  
寺鳴鐘亂風湖去舫遲清樽歡不極醉筆更題詩

崇壽院前舊有金牛護法院巾子峰前有金輪梵天  
院並廢

寶石山麓為大佛禪寺沁雪泉

大石佛舊傳為秦始皇纜船石宋宣和中僧思淨者  
當兒時見之作念曰異日出家當鑄此石為佛及長  
為僧妙行寺遂鑄石為半身佛像飾以黃金構殿覆  
之遂名為大石佛院元至元間院燬佛像亦剝落皇  
明永樂間僧志琳重建勅賜為大佛禪寺弘治四年

僧永安重修寺畔有塔俗稱壺瓶塔乃元時西河僧  
所建張輿詩葛僊嶺西大石頭祖龍東來曾繫舟不  
聞登僊入蓬島徒見作佛如嘉州地湧半身雲水繞  
山開一面金碧浮幾回劫火燒不盡空對湖山飛白  
鷗 吳立夫詩手撫一片石昔為滄海濤始皇或繫  
纜萬里浩無津世間本妖妄何處有僊真蓬萊不可  
到弱水空颿輪徐生或云去方士先避秦童男繼童  
女五穀襍貨珍島嶼止不返蛟龍化其民非惟長年

藥永隔戰馬塵人君却未悟望望轉東巡山鬼覺將  
死海魚祠作神侯生奉圖錄譏諫極所陳驪山閔鳧  
雁金柳竟沉淪借茲鑒不遠遺蹟留千春經營大屋  
覆刻斲青蓮身漢唐幾英主覆轍猶爾遵我恐石有  
語神僊多誤人

沁雪泉在佛身右壁棠陵方思道題

寺畔舊有相嚴院冠勝軒西有水月園大吳園小吳  
園嘉澤廟孫花翁墓並廢相嚴院晉天福二年錢

氏建有十三間樓樓上貯三才佛一尊蘇子瞻治郡  
時常判事於此 水月園高宗以賜楊和王存中者  
御書水月扁孝宗朝更賜秀王伯圭有水月瀛玉林  
堂俯挹澄湖萬柳成幕燕遊者多集焉 嘉澤廟即  
水僊祠梁大同間建以奉錢唐湖龍君錢鏐碑記宋  
時移建於蘇堤 孫花翁墓翁名惟信字季蕃仕宋  
光宗時棄官隱西湖工為長短句好藝花卉自號花  
翁家徒壁立無旦夕之儲彈琴讀書晏如也既卒安

撫趙與憲葬之墓近水僊王廟仇仁近詩水僊分地  
葬詩人一片荒山野火焚薦菊有亭今作圃掃松無  
子謾留墳蝸牛負殼粘碑石老鸛攜雛入隴雲欲把  
管絃歌楚些却憐度曲不如君

又西為智果禪寺參寥泉

智果寺舊在孤山吳越王所建宋紹興間徙築於此  
先是蘇子瞻守杭州與智果院禪師參寥子善名其  
所居泉曰參寥泉寺既徙北山有泉適出寺後好事

者仍名參寥泉以志舊蹟元末燬皇明洪武初僧可  
祥慧炬重建其梁題云元祐五年歲在庚午二月辛  
卯朔二十五日乙卯上梁蓋子瞻手書自孤山移置  
者 張光弼詩佳遊在上巳屬此清明前春景已云  
暮風光猶未暄往尋智果寺竟得參寥泉景物豈殊  
昔人世自更遷邈哉長公詠風流想當年我輩復登  
臨化界何因緣古佛儼香閣真詮積華軒境超萬念  
空道勝諸妄捐緬懷此會難徘徊未云還申章續芳



藻冀或來者傳 吳立夫詩古寺湖水上寺門但菰  
蒲一泉湛如玉巖骨早不枯粵從參寥鑿得與蓋壤  
俱東坡或茗宴西嶺猶松筭人誰問詩侶世頗笑酪  
奴瓦甃縱然在木瓢知己無汲水宜汲深塵心非輓  
轡別禪勝別味俗舌空醍醐老僧久不識香爇冷宿  
盂卓哉郡太守遺像擁眉鬚閒來試我酌霧雨變須  
臾尚持金芙蓉便踏赤鯁魚

又西為顯功廟

顯功廟祀宋布衣岳琚琚錢唐霍山人建炎三年冬  
完顏宗弼由獨松關犯杭州守臣遁於赭山琚乃捐  
家資以充軍餉推錢唐令朱蹕為謀主金祝二尉為  
先鋒率死士誘敵由西溪並天竺東來塹葛嶺編竹  
覆泥以陷之虜後寇城西琚力戰死焉郡人感之為  
請於朝立祠於此

又西為錦塢初陽臺紫陽書院葛翁井

錦塢在寶雲山東宋時此地花卉燦然若錦故名

初陽臺在山巔葛僊翁修真時吸日月精華於此高  
朗宜遠眺清曉煙消日出海底烟然奇觀楊仲弘詩  
彩雲相羃歷華露共嬋娟在水渾疑墮當空孰使懸  
潛虬精魄動宿鶴羽毛鮮寂寂丹臺夜相從訝得僊  
丹臺欲上路盤盤秋月圓時正好觀已作高亭凌  
峯寧豈辭深夜倚欄干雲封大壑蛟龍睡露下蒼林  
翡翠寒下顧塵寰悲迫阨致身何止在雲端 張伯  
雨詩初陽臺上新亭好一曲笙簧石壁開驚起玄真

狂道士步虛飛下玉清臺

紫陽書院祀紫陽先生也蓋先生提舉浙東時有大  
惠政於法得祀藩臬屢加修葺有崇道堂初陽山房  
浴日泉瑪瑙坡寶雲茶塢諸勝

葛翁井去智果寺西南上方下圓相傳葛稚川投丹  
之所今在馬氏園宣德間大旱甃而涸之得石匣一  
石瓶四匣固不可啓瓶中有丸藥若芡啗之絕無臭  
味乃棄之施漁翁獨啗一枚後年百有六歲井遂淤

惡不可食以匪投之甘冽如故張伯雨詩一宿葛翁  
丹井上化為蝴蝶夢魂清湖田涼蛤四散吠烟寺曉  
鐘相遞鳴孤嶼橫陳為玉几初陽煥爛似霞城擎舟  
又入水雲去還我風篁雪竇聲 葛洪井上訪真居  
一飲丹泉足自如拂袖莫嫌狂散甚子非知我我知  
魚

錦塢西舊有普安院治平寺玉清宮雲巢樓並廢  
治平寺初名錦塢庵僧法聰建有烟雲閣 玉清宮

宗紹定初建理宗御書扁元至正末燬趙達夫白珽  
鮮于樞聯句二首湖田漠漠水禽飛達夫堤柳斜斜  
帶夕暉樞二月江南好天氣珽初陽臺上愜春衣樞  
巾子峰頭艤釣船達夫初陽臺上坐鳴絃出雲高樹  
明殘日珽過雨蒼苔泣細泉絕俗誰能繼遐躅樞凌  
空我欲學飛僊達夫還家正恐鄉人問珽化鶴重來  
知幾年樞雲巢樓在玉清宮內張伯雨詩初陽臺  
上白雲多雲裏層層玉樹歌棲息一枝緣未穩飛翻

千仞柰危何雨中幕燕雷驚起峰頂笙鸞月送過好在丹梯無百尺屋頭看盡白鷗波

又西為寶雲山瑪瑙講寺後僕夫泉

瑪瑙講寺故名瑪瑙寶勝院在孤山晉開運三年錢氏建宗大中祥符間高僧智圓重修紹興間徙築於此元末燬皇明永樂間重建陟山之巔石磴數百級有閣凌空特起憑眺最勝俗稱瑪瑙山居者是也陳諭詩雨霽佛屋明苔迳深曲折樹搖高露驚草密暗

泉咽前林或清磬烟燈遠欲滅寄謝塵中人與君從此別

後僕夫泉元僧芳洲所鑿也先是智圓居孤山有僕夫藝竹得泉遂號僕夫泉後徙寺茲山藉葛井以汲寺僧艱之芳洲鑿地得此遂名後僕夫泉

寺西宋有養樂園半春園小隱園瓊華園寶雲庵並廢養樂園賈似道別墅也內有光祿閣春雨觀嘉生堂生意生物之府似道既敗有人題其壁曰老壑



曾居葛嶺西遊人誰敢問蘇堤勢將覆餗不回首事  
到出師方噬臍廢圃更無人作主敗垣惟有客留題  
筭來祇是孤山耐依舊梅花伴月低蓋似道嘗住園  
中有遊騎過門者輒為偵事者擒入有官者黜有財  
者籍其妾兄闕瞰亦縛投火中 半春小隱瓊華皆  
史彌遠別墅也臺榭工麗在在殊宜 寶雲庵宋乾  
德二年吳越王建名千光王寺雍熙二年改今額寶  
慶間為邵王攢所元至正末燬內有靈泉井月窟澄

心閣南隱堂妙思堂蘇子瞻次寶雲僧仲殊雪中遊  
湖韻詩寶雲樓閣開千門林靜初無一鳥喧閉戶莫  
教風掃地捲簾疑有月臨軒水光潋灩猶浮碧山色  
空濛已斂昏乞得湯休奇絕句始知鹽絮是陳言

又西為葛嶺葛僊翁墓

葛嶺上有葛僊翁墓葛洪字稚川晉時人博聞深洽  
江左絕倫好神僊導養之術見高士郭文舉於大滌  
山中覲德而悟道結廬西湖修真著書號抱朴子嶺

上有甘露泉梅泉薩天錫詩煉丹僊子渺茫間一夕  
乘風去不還火冷爐頭灰已盡雲封洞口嶺長閒千  
年瑞氣生瑤草夜半天風響佩環真境空明自今古  
煙塵依舊隔瀛寰 吳立夫登初陽臺謁抱朴子墓  
詩人生擾擾間頗覺天地窄我憶抱朴子高臺睨空  
碧初陽出山上照破萬古石丹光動鼎鑪霧氣浮冠  
舄遺書上下卷道妙或黃白老衰及病瘦辛苦為形  
役豈伊鸞鳳姿終以狐兔宅尸解本無形空飛寧復

全宋文卷八  
卷八  
蹟郭君曾有傳勾漏恍所歷降子倘可問稚川特未  
隔幽林來題題缺井守蜥蜴神僊果何人海嶽長戲  
劇世傳老聃死吾謂方朔謫虛墳誰所為怪樹獨悲  
激滿前湖與山秋色落几席因茲些爾魂目送天邊  
翻

嶺上舊有招賢寺嶺下有集芳園壽星院善住閣香  
月隣挹秀園秀野園趙紫芝墓並廢 招賢寺唐德  
宗時郡人吳元卿為六宮內使棄官學道結庵山中

開運三年錢氏改建為寺有尉遲恭井蒙泉東坡書  
扁白樂天紫陽花詩序云招賢寺有山花一樹色紫  
氣香芳麗可愛頗類僊物而人無識者因以紫陽花  
名之詩云何年植向僊壇上早晚移栽到梵家雖在  
人間人不識與君名作紫陽花 集芳園故張婉儀  
別墅也紹興間收屬官家藻飾益麗有蟠翠雪香翠  
岩倚綉挹露玉蕊清勝諸扁皆高宗御題淳祐間理  
宗以賜賈似道改名後樂園樓閣林泉幽暢咸極古

木壽藤多南渡以前所植者積翠迴抱仰不見日架  
廊疊磴幽渺逶迤隧地通道抗以石梁旁透湖濱飛  
樓層臺涼亭燠館華邃精妙前挹孤山後據葛嶺兩  
橋映帶一水橫穿各隨地勢以構築焉理宗為書西  
湖一曲奇勛扁度宗為書秋壑遂初容堂扁又有初  
陽精舍警室熙然臺無邊風月見天地心琳琅步歸  
舟甘露井諸勝元大德初僧滿月即其址建福地院  
趙子昂為之記至正末燬林景熙詩當年構華居權

燄傾衛霍地力窮斧斤天章煥丹雘花石擬平泉川  
途致茲壑唯聞丞相嗔那後天下樂我來陵谷餘山  
意已蕭索蒼生墮巔崖國破身誰託空悲上蔡犬不  
返華亭鶴丈夫保勲名風采照麟閣胡為一聲鉦聚  
鐵鑄此錯回首草萊碑荒烟掩餘作 壽星院有盃  
泉靈泉寒碧軒此君軒平秀軒垂雲亭明遠堂其上  
有閣曰江湖偉觀安撫趙與憲建蘇子瞻守杭日常  
遊焉入門即悟前身曾到歷言院後殿閣山石之名

無一遺謬故湖中詩詠於此居多其次周長官韻詩  
瑠璃百頃水僊家風靜湖平響釣車寂歷疎松歆晚  
照伶俜寒蝶抱秋花困眠不覺依蒲褐歸路相將踏  
桂華更著綸巾披鶴氅他年應作畫圖誇 寒碧軒  
詩清風肅肅搖牕扉牕前修竹一尺圍紛紛蒼雪落  
夏簟冉冉綠霧沾人衣日高山蟬抱葉響人靜翠羽  
穿林飛道人絕粒對寒碧為問鸛骨何緣肥 垂雲  
亭僧清順作子瞻詩云江山雖有餘亭榭著難穩登



臨不得要萬象各偃蹇惜哉垂雲軒此地得何晚天  
功爭向背詩眼巧增損路窮朱欄出山破石壁根海  
門浸坤軸湖尾抱雲巘葱葱城郭麗淡淡烟村遠紛  
紛烏鵲去一一漁樵返雄觀快新獲微景收昔遁道  
人真古人嘯咏慕嵇阮空齋卧蒲褐芒屨每自捆天  
憐詩人窮乞與供詩本我詩久不作荒澁旋鋤墾從  
君覓佳句咀嚼廢朝飲此君軒詩卧聽謾謾碎龍  
鱗俯看蒼蒼玉立身一舸鴟夷江海去尚餘君子六

千人 車玉峰明遠堂詩十年不向此凭欄景象依  
然一望間龍蜃吐雲天入水樓臺倒影日啣山僧于  
僻寺難為隱人在扁舟未是閒孤鶴似尋和靖宅盤  
空飛下復飛還 朱繼芳江湖偉觀詩吳山表裏水  
為池百有餘年壯帝居天目遠將雙鳳落海門近拱  
六龍飛胥濤白雪生秋思太乙紅雲駐夕暉江上沙  
鷗湖上舫柳邊風裏雨依依 善住閣運使瞿拱捨  
宅建有山中四時亭安樂窩 香月隣廖瑩中園後

併於似道 挹秀園楊駙馬別墅 秀野園劉廊王  
琦別墅有四并堂 趙紫芝墓趙師秀溫州人工詩  
有集卒葬於此劉後村弔詩有盡出香分妓惟留硯  
付兒之句蓋亦宕逸之士也

其前為四聖延祥觀竹閣

四聖延祥觀舊在孤山宋高宗為康王時常使于金  
夜見四巨人執仗衛行詢之方士云紫微有大將四  
名曰天蓬天猷翊聖真武王心異之及即位乃建觀

祀之即今六一泉地是也元嘉木楊喇勒智改于武林  
門外至正間再遷葛嶺

竹閣舊在孤山寺中白樂天所作杭人因以祀公宋  
時徙建於北山報恩院故稱竹閣寺黃宜山詩移自  
孤山占此山荒涼老屋萬琅玕櫻桃楊柳空花夢千  
古清風滿閣寒今其地為杭妓沈氏園嘉靖二十四  
年沈氏坐法當籍太守陳公一貫欲改祠宇以祀楊  
公孟瑛士論以妓室不可棲郡長陳公患之時客有

說公者曰何不還以祀白公也白公守杭時勤民敏政操履清白然雅好躋攀屬意聲妓去郡數載猶有沉紅昵綠之思故其詩云故妓數人憑問訊新詩兩首倩流傳意趣所鍾生死一致奉以安神似無不可况又仍其故地乎陳公然之遂扁其堂曰竹閣門曰玄關從公詩所謂無勞別修道只此是玄關也近廢為六橋草堂少卿徐江山別業

又西為虎頭巖嘉德永壽講寺

虎頭巖山形突出若虎頭然吳越王盛時望氣者云  
杭州有王氣藝祖命鑿之今斷落矣巖下宋有儀王  
墓顯明寺儀王仲湜宗宗室也當靖康時徽欽北駕  
六軍欲擁王而立之王堅拒不從曰自有真主六軍  
遂約王踰月真主不出則王當大位王陽許之未幾  
高宗即位於應天王薨關詣行在命為濮王後常自  
贊其容曰性比山廩貌同野叟皓月清風良朋益友  
湛然靈臺確乎不朽薨後葬於此其子孫視諸藩為

盛人以為積善之報云

嘉德永壽講寺宋理宗時秦國夫人毛氏者皇后母也既老結庵於此就葬焉即庵為寺有芝產墓側因名芝巖前有放生池翔泳堂幻隱洞寶粧閣東有寶巖院垂雲亭借竹軒西有定業院環峰堂襲夢軒神僊宮靈耀觀並廢白廷玉翔泳堂酒中詩瓌辭度得雪兒歌濃墨斜書碧玉柯醉折芙蓉薰酒盞裏湖涼似外湖多

又西為鳳林禪寺君子泉

鳳林寺俗呼喜鵲寺唐長慶初禪師圓修居此四十  
餘年棲息松上有鵲構巢其傍人遂呼為鳥窠禪師  
白樂天守杭州時常往參之曰大師居處甚險禪師  
曰太守險樂天曰弟子位鎮山河何險之有禪師曰  
心火相構識浪不停得非險乎樂天服之宣德間僧  
如月重建勅名鳳林寺圓修骨塔存焉僧來復詩寶  
網金幢變劫灰瞿曇寺裏盡蒿萊鳥窠無樹山夔泣



不見談禪太傳來

君子泉本在定業院中亦烏窠禪師道場也院廢而  
泉湮後人遂勒石於此寒冽而深會為方沼可冰鮮  
焉

寺右舊有快活園水竹院落仁壽庵並廢 快活園  
趙婉容別墅 水竹院落賈似道離亭在西泠橋南  
左挾孤山右帶蘇堤波光萬頃與闌檻相值騁快絕  
倫內有奎文閣秋水觀思剎亭

西湖遊覽志卷八

欽定四庫全書

西湖遊覽志卷九

明 田汝成 撰

北山勝蹟

葛嶺之西為履泰山棲霞嶺桃溪棲霞洞紫雲洞牛皋  
墓妙智庵

棲霞嶺上桃花爛燦色如凝霞其北有古劒關蓋左  
寶雲右僊姑兩山夾峙若劒門然宋立巡司於此有

水一道名桃溪經岳墳前入湖嶺西為烏石塢

棲霞洞在妙智庵左地多怪石隱翳榛莽中賈似道望而異之命施畚鍤倏見竒邃乃抉藏剔幽為亭曰暢曰鑰俗入其中穹然如夏屋雙石相倚為閑閱風從南來豁豁而出寒骨淒神不可久竚故暑遊最勝石甃小臺突然坎中衡二石下達於坻仰視左竇四五通明大者圓徑丈許有水洞深不可測頃者惡僧以遊人之多塞充垢徑僅餘丈尺耳

紫雲洞在嶺巔去妙智庵數百步許倚空如懸陰涼  
徹骨

牛臯暮在劒門關畔臯字伯遠汝州魯山人為岳武  
穆部將累立戰功轉寧國軍承宣使紹興十七年上  
巳日都統制田師中大會諸將臯遇毒亟歸語所親  
曰臯年六十一官至侍從即死無恨所恨者南北通  
和不以馬革裹屍顧死牖下耳明日卒或言秦檜使  
師中毒臯云景定初追封輔文侯

妙智庵即牛臯香火院嶺北有金鼓洞昔人伐石其間聞金鼓下作乃止

嶺下有處士仇仁近員外郎張光弼墓並廢 仁近名遠錢唐人宋咸淳名士宋亡落魄江湖元初辟漂陽州學正未幾隱去工詩文所著有山村集洪武初祠於府學鄉賢祠錢思復挽詩詩窮八十年江海正淒然玉塵風生頰青山雪滿巔門墻張籍俊墓表孟郊賢出處人皆識哀歌徹九泉張仲舉詩前輩凋零

盡南陽有古阡詩應傳四海酒不到黃泉槐國真成  
夢桃園亦是僊松根一掬淚慘淡墮風煙 張光弼  
廬陵人仕元為浙省左司員外郎罷官居花市遨遊  
湖山累月不返有詩名所著有左司集其詩云但教  
懷抱能傾倒莫向尊壘計有無不為訪僧三竺寺肯  
乘煙艇過西湖酒館湖船盡有名玉杯時得肆閒情  
至今人說張員外不是看花不入城

嶺下為岳武穆王墓翊忠祠分屍檜流芳亭

岳武穆王墓王名飛字鵬舉相州湯陰人少負氣節  
沉毅寡言有神力未冠挽弓三百觔弩八石宋高宗  
時以戰伐功歷官都統屢陳恢復大計高宗慮欽宗  
之返而攘已也陽獎而陰憾之丞相秦檜揣知帝旨  
遂力主和議會烏珠冠拱毫詔飛往援金人大敗追  
及朱仙鎮中原響應謂其部下曰直抵黃龍與諸君  
痛飲耳方指日渡河而檜欲割淮以北棄之乃召張  
俊楊沂中先歸言飛孤軍不可久留以金牌十二召



之班師飛憤惋泣東向拜曰十年之力壞於一旦矣  
明年烏珠寇淮西張俊畏敵不敢進詔飛往援烏珠  
遁俊忌之飛遂力請解兵柄會烏珠遺檄書言飛不  
死和議終不成檜乃諷臺臣何鑄羅汝楫等交章論  
飛言金人攻淮西飛至舒蘄而不進與張俊按兵淮  
上又欲棄山陽而不守張俊又劫王俊誣飛令張憲  
岳雲通書協謀冀以兵柄還飛檜遣使捕飛父子下  
獄令諫議大夫万俟卨鞠成之會歲暮獄無佐證檜

一日獨居書室食柑玩皮若有思者其妻王氏窺咲  
曰老漢一何無決擒虎易縱虎難也檜犂然當心致  
片紙獄中即日報飛死矣蓋摺殺之年三十九雲憲  
皆棄市獄卒隗順負飛屍踰城至九曲叢祠潛瘞之  
以玉環殉樹雙橘識焉紹興末金人益猖獗太學生  
程宏圖訟飛冤詔還飛宗屬徙邊者孝宗詔復飛官  
謚武穆改葬於棲霞嶺雲祔其旁廢智果院為祠賜  
額曰褒忠衍福寺墓上之木皆南向蓋英靈之感也

嘉定四年封鄂王宗亡寺廢王之六世孫在江州者  
名士迪與宜興岳氏通譜合力起之未幾復廢至元  
間天台僧可觀者訴於官鄭明德為作疏語云竊念  
故宗贈太師武穆岳鄂王忠孝絕人功名蓋世方畧  
如霍嫖姚不逢漢武徒結志於忘家意氣如祖豫州  
乃遇晉元空誓言於擊楫賜墓田棲霞嶺下建祀祠  
秋水觀西落日鼓鐘長為聲冤於草木空山香火猶  
將薦爽於淵泉豈期破蕩子孫盡壞久長規制典補

田隳佛宇春秋無所烝嘗塞墓道毀神棲風雨遂頽  
廟貌鵲鷗夜啼拱木躑躅春開斷垣淚落路人事闕  
世教蓋忠臣烈士每詔條有致祭之文豈狂子野僧  
撓國典出募緣之疏望明有司告之臺省冀聖天子  
錫之珪璋褒忠義在天之靈激死生為臣之勸周武  
封比干墓事著遺經唐宗建白起祠恩覃異代疏成  
杭州經歷李全慨然重興之廟塑王像以其子雲雷  
震霖霆祔焉後作燕寢像王父母及王夫人與王之

女號銀瓶娘子者尋燬雲飛養子也每立奇功飛輒  
隱之能握鐵椎重八十斤死年二十三霖子珂嘉定  
間作籲天辯誣錄天定錄程史金陀粹編飛事愈白  
廟中有石刻飛詩詞二首送紫岩張先生北伐詩云  
號令風霆迅天聲動北陬長驅渡河洛直擣向燕幽  
馬蹀閼氏血旗臬可汗頭歸來報明主恢復舊神州  
其詞云怒髮衝冠凭欄處瀟瀟雨歇擡望眼仰天長  
嘯壯懷激烈三十功名塵與土八千里路雲和月莫

等閒白了少年頭空悲切靖康恥猶未雪臣子恨何  
時滅駕長車踏破賀蘭山缺壯志饑殮狼虎肉笑談  
渴飲匈奴血待從頭收拾舊山河朝天闕皇明初勅  
建其祠有司春秋致祭弘治間叅政周木得其裔孫  
於衢州召令世守之太監麥秀重建殿寢雲所用鐵  
鎗猶存正德八年都指揮李隆鑄銅為秦檜王氏万  
俟卨三像反接跪露臺十二年太監王堂塑王父母  
妻子女諸像扁曰一門忠孝古今弔其墓者詩已成

集畧掇其著者葉紹翁詩萬古知心只老天英雄堪  
恨復堪憐如公少緩須臾死此敵安能八十年漠漠  
凝塵空偃月堂堂遺像在凌煙早知埋骨西湖路悔  
不鴟夷理釣船 林弓寮詩天意只如此將軍足可  
傷忠無身報主冤有骨封王苔雨樓牆暗花風廟路  
香沉思百年事揮淚對斜陽 趙子昂詩岳王墳上  
草離離秋日荒涼石獸危南渡君臣輕社稷中原父  
老望旌旗英雄已死嗟何及天下中分遂不支莫向

西湖歌此曲水光山色不勝悲  
高則誠詩莫向中原嘆黍離  
英雄生死係安危內庭忽下班  
師詔絕漠全收大將旗  
父子一門甘伏節山河萬里竟分支  
孤臣尚有埋身地二帝遊魂更可悲  
潘子素詩海門寒日澹無輝  
偃月堂深晝漏遲萬竈貔貅江上老  
雨宮環珮夢中歸內園羯鼓催花發  
小殿珠簾看雪飛不道帳前胡旋舞  
有人行酒著青衣林清源詩誰收將骨葬西湖已卜他年必沼吳  
孤冢有人來下馬



六陵無樹可棲烏廟堂短計慚嫠婦宇宙惟公是丈  
夫往事重觀如敗局一龕燈火屬浮屠 徐孟岳詩  
童大王歸事已離岳將軍死勢尤危直教萬歲山頭  
雀去遶黃龍塞上旗飲馬徒聞腥鞞洛洗兵無復望  
條支湖邊一把摧殘骨蓋世功名百世悲 高季迪  
詩大樹無枝向北風千年遺恨泣英雄班師詔已成  
三殿射敵書猶說兩宮每憶尚方誰請劒空嗟高廟  
自藏弓棲霞嶺上今回首不見諸陵白露中 陶九

成詩精忠祠宇西湖上再拜荒墳感昔遊斷碣草深  
蒙巽巖空山日落叫鉤輅運移宋祚難恢復帝幸燕  
雲困擄囚逆檜陰圖傾大業昭陵無意問神州偷安  
甫遂邦家志飲痛甘忘父母讎信使北和憐屈膝策  
文南駐忍含羞兩宮五國瞻征幟丹詔班師下節樓  
萬里長城直自壞中興武績遂云休嗚乎竟死姦邪  
手顛沛誰為社稷憂黯黯冤魂遊狴犴紛紛雨淚泣  
貔貅唯餘滿地萑弘血不見中流祖逖舟氛氤已塵

金匱匪冕旒終換鐵兜鍪姓名竹帛書千載父子英雄土一丘老樹尚知朝禹穴遺黎總解說王猷復田起廢憐僧寺移檄褒嘉賴省侯聖世即今崇祀典佇看寵渥到松楸

翊忠祠以祀劉允升施全者允升建州布衣士也聞岳武穆王被逮詣闕上書訟其冤秦檜大怒下棘寺論死全殿前司小校也憤秦檜主和議誤國挾刃刺之不中被擒磔於市弘治二年工部主事莆田林沂

金定...  
卷九  
建祠祀之四年按察使楊俊副使吳伯通等重拓大之題其祠曰翊忠

分屍檜在墓前天順間杭州同知馬偉鋸而植之首尾異處以示磔屍狀至今猶活前有石壁書盡忠報國四字每字方五尺餘

流芳亭在墓西有石刻王像存焉其贊曰惟武穆王天錫勇智氣吞強胡力扶宋季桓桓師旅元戎是寄行將恢復遭讒所忌生既無怍死亦何愧萬古長存

惟忠與義

祠之後為掃帚塢黃龍洞護國仁王禪寺

護國仁王禪寺宋淳祐間經畧花園使孟珙建自其  
趾斗折而上有洞豁豁深杳莫測水泉紺凜旱不縮  
而潦不盈有龍居焉故老相傳曩夏雨初霽時常有  
神物蜿蜒卧松上其氣苒苒然而黃蓋黃龍也故世  
號黃龍洞珙既建仁王寺并作龍祠延高僧慧開居  
之屬歲又旱理宗召慧開祈雨退而默坐帝遣內侍

問之對曰寂然不動感而後通既而大雨自是無雨  
輒禱禱輒應遂封黃龍為靈濟侯賜祠額曰護國龍  
祠元至正燬洪武初僧祖吉重建其東有黃山橋塢  
內有天龍庵永安院西靖宮並廢

又西為淨性禪寺

淨性寺宋乾德五年吳越王建名淨心院大中祥符  
間改今額元末燬國初重建傍有青衣橋

履泰山之西為僊姑山張憲墓

僊姑山之西東山街口可通古蕩西溪靈隱山脈至此少伏若斷而連其旁有桃花術舊有淨勝院俗稱昇仙宮宋時女僧妙清建高宗嘗臨觀焉有御愛松院側有乾濕水洞

張憲墓憲岳武穆愛將也累立戰功紹興十年烏珠頓兵臨穎憲破其兵追奔十五里中原大震會秦檜主和班師憲還未幾檜與張俊謀殺岳飛誘飛部曲能告飛事者卒無人應張俊乃自為狀付奸人王俊

妄言憲與岳雲通書謀還飛兵權張俊親行鞫煉憲  
被掠無全膚竟不伏張俊乃手具獄詞告成於檜憲  
坐死葬於此景定二年追封烈文侯元總管夏思忠  
為立石表其墓尋廢皇明正德十二年布衣王天祐  
發地得碣石乃崇封焉知府梁材為建廟宇修撰唐  
臯為之記

山麓舊有冲虛觀福壽觀妙明院傳經院淨元觀藥  
洲園並廢 冲虛觀宋寧宗時宮人張氏為尼建此



福壽院乃旌德寺之子院也有寧宗御書桂堂二字  
葯洲園廖瑩中別墅有花香竹色太平相在世  
綵愛君子習說等亭

僊姑山之西為青芝塢玉泉講寺

青芝塢有五色土雜銀星者嘗產青芝從石板巷入  
南宋駐蹕繞湖皆市廛也故有巷名其前為佛牙塢  
玉泉寺故名淨空院南齊建元中僧曇超說法於此  
龍王來聽為之撫掌出泉遂建龍王祠晉天福三年

始建淨空院於泉左宋理宗書玉泉淨空院額以榜  
之祠前有池畝許清澈可鑑蓄五色魚數十頭遊泳  
如畫其泉溉田千頃近者曰鮑家田吳越相鮑慶臣  
采地也皇明宣德間置白紙局就池造紙清濁久之  
局廢而泉復清矣旁一小池水翠綠雖以白粉投之  
亦成綠色白樂天詩湛湛玉泉色悠悠浮雲身閒心  
對定水清淨兩無塵手把青筇杖頭戴白綸巾興盡  
下山去知我是何人 吳廬靜過鮑家田詩搖旆家

家酒扶犁處處村草深迷井口槿密擁籬根綠水明  
秧本青山失燒痕多應忌蠶事畏客掩柴門

塢內舊有慈聖院普向法院竹所院天清宮常清宮南  
禪資福尼寺顯忠寺顯嚴寺報德寺並廢 慈聖院  
有呂公池宋乾道間高僧能會池上縛庵取水咒之  
以施病者輒愈遂號聖水池 普向法院宋紹興間殿  
帥楊存中請以鮑家田為殿司諸軍葬所建院守之  
尋加愍忠資福普向之額 天清宮宋時道士沈師

謙建 常清宮宗沂王功德院 南禪資福院宗紹  
興初封開尼惠果從駕建累朝內宮施捨殿宇甚盛  
顯忠寺宗內侍羅舜香火

其後為靈峰禪寺

靈峰寺故名鷲峰禪院晉開運間吳越王建延伏虎  
光禪師居之捨田數千畝度僧數百宗治平間改賜  
今額俗傳為唐時裴休墓院者非也寺內有翠微閣  
眠雲堂洗鉢池幽僻岑寂遊人罕至天陰月黑時聞

張魑悲嘯林間近有築墳其旁者穴地丈餘得甕缶  
畜腐墨物若醯醬類者蓋兵燹之餘也前朝居民稠  
密湖山殆無隙地云

又北為法華山秦亭山方井佛惠禪寺智勝庵東嶽廟  
法華山去靈隱山後可里許去北十里為西溪秦亭  
則法華之分脈也俗訛為靖艇山

方井在桃源嶺下徑六尺深一仞許井上有亭米元  
章書扁久廢正德十年里人王槐重建進士鄧鑒記

佛惠禪寺晉天福中建


智勝庵皇明弘治間建

東嶽廟宋時建

青芝塢西南為慶化山水竹塢神霄雷院

水竹塢宋為步司前軍寨其旁有宋殿撰周杞墓杞  
處州人建炎三年知常州值苗劉之亂杞倡義勤王  
以功除右文殿修撰卒葬於此其兄格建炎初為浙  
西提刑死於陳通之亂贈龍圖閣學士勅葬於其山  
兄弟忠義名震一時云

神霄雷院宋咸淳間羽士陳崇真者自閩來卜居於  
此善雷法因勅建雷院以居之賜號冲素真人六月  
二十四日郡人雲集設醮捨貲至今不廢



西湖遊覽志卷九